



蜀中名勝記卷之十一



閩中曹學佺能始著

上川南道

嘉定州

水經曰江水至犍爲武陽縣青衣水沫水從西南來合而注之酈道元註云江水又東南逕南安縣西有熊耳峽連山競險接嶺爭高河平中山崩地震江水逆流懸瓠有灘名壘坻亦曰鹽瓠李冰所平也縣治青衣江會襟帶二水矣○華陽國志云青衣有沫水出濛山下伏行地中會江南安觸山脇涵崖水脈漂

疾破害舟船歷代患之李冰發卒鑿平澗崖通正水道或曰冰鑿崖時水神怒冰乃操刀入水中與神鬪至今蒙福按漢書溝洫志蜀守李冰鑿離隼避沫水之患晉灼云隼古埏字卽此○寰宇記云青衣水發源自瀘山徼外東南流逕嚴道洪雅夾江至龍游與岷江合沫水發源大渡河一名峩水自陽山縣流入江按青衣沫水合流在州西十五里俗名尖山其下爲紙房楮薄如蟬翼而質堅可久○通志云嘉定州治在兩川合流之際晉郭璞所定治東有八卦井卽璞所鑿○水經注云蜀王開明故治也來敏本蜀論

曰荆人鼈令死其尸隨水上荆人求之不得鼈令至汶山下邑復生起見望帝望帝者杜宇也從天下女子朱利自江源出爲宇妻遂王於蜀號曰望帝望帝立鼈令以爲相時巫山峽壅而蜀水不流帝使鼈令鑿巫峽通水蜀得陸處望帝自以德不若遂以國禪號曰開明○蜀記云古夜郎國傳爲一女人浣溪有竹浮下而中啼聲取而視之則孩也及長呼爲夜郎封竹溪王今治北三里有竹公溪矣按宋祁荅勸農李淵宗嘉州江上見寄詩嘉月嘉州路荊峩接畫船山圍杜宇國江入夜郎天卽詠此事又輿地廣記云

漢武帝開夜郎置犍爲郡漢書地理志夜郎故縣乃屬牂柯郡如此則今之嘉州犍爲縣非夜郎故地矣後世徒見嘉州名犍爲郡又領犍爲縣遂以爲夜郎國恐失真○蜀志補罅云嘉州十五景唐貞觀中刺史盧士理記曰望靈峰曰西嶺精舍曰石梁水曰後壑曰分溪塘曰桂竹汀曰梭原曰茗岡曰大度潭曰長林閣曰望山臺曰青菴徑曰山梔園曰石壑院曰南洲草堂併賦詩刻之石上宋鄧諫從云天下山水窟有二曰嘉定曰桂林鮮于繪議道堂記云漢嘉背負三峩襟帶二江爲西南州最清歸處○海錄碎事

載僞蜀歐陽柳得嘉州曰青山綠水中爲二千石作詩飲酒爲風月主人豈不佳哉其後太守呂昌朝以宋復古所畫八景圖皆天下名勝懸於州治與相映發蘇子瞻有八咏繼東吳之贈也○蜀都賦云戶有橘柚之園注曰出犍爲南安縣華陽國志南安有柑橘官社出名茶○寰宇記云有石碑山山上遍植海棠爲郡守宴賞之地一名海棠山花譜云海棠有色無香惟蜀之嘉州者有香○吳中復戒石云嘉州出荔枝輿地紀勝有荔枝樓愛日齋叢抄云乾道間陸放翁取家藏前輩筆札盡刻石置荔枝樓下○方輿

勝覽云梨花山過西津橋五里有梨花百餘樹人寒疾取此花食之卽愈岑參過西津王判官所居詩勝迹不在遠愛君池館幽素懷茗中語宛得塵外遊○通志云蓮花山在治東八里山陽有溪四時不涸產蓮花爲盛○樓臺亭榭雅與勝會者曰都督府唐于邵序云犀灘古地熊阜外虞長空青冥通波萬里○曰郡齋平望江山岑參詩山光圍一郡江月照千家○曰丁東院在州學前院有方響洞洞腹有水如環珮聲黃魯直詩古人題作丁東水自古丁東直至今我爲更名方響洞信知山水有清音范成大詩隔凡

水磳不可越衆真微步壺中月徙倚含風玉佩聲何須聽作蕤賓鐻自注云漢嘉廣佛院中水洞有聲琅然莫知其所由來舊名丁東水山谷易今名且有詩也石介詩云萬樹芙蓉秋色裏千家方響月明中○曰澄江樓在憲司左窺龍泓右瞰烏尤高明爽塏得江山之趣淳祐間提刑程逢辰摹刻蘇子瞻書其外祖程公逸事於此○曰明月樓在譙樓之右下瞰明月湖郭璞識云鬱姑鬱姑將州對洛都但看千載後變成明月湖後隋鬱姑將軍開此湖也洛都山名在州西五里○曰璧津樓宋郡守游仲鴻建魏了翁記

在治東南跨城爲樓下瞰江流三峩九頂森列左右
○曰萬景樓在高標山上高標一名高望郡之主山
也有弘明觀後周所剏隋大業末方製大殿塑飛天
神王像無名氏記其神異甚詳樓爲宋郡守呂由誠
建宇文粹中記范成大云嘉州城中山上登覽勝絕
殆冠西川予令畫工作圖以歸山谷山谷來游時但
有安樂園未有此樓也後人立涪翁亭在此樓前○
曰月榭陸務觀詩試傾萬景湖亭酒來看半輪江月
秋爲同年王子蒼作也註云傍榭有一崑景趣尤佳
子蒼欲作樓未果○曰碧雲亭在石筍之隙楊暈記

云石挺出於山旁高丈有二尺上銳而下廣衆水匯
於前左右視羣山之邈迤若覆盂於地此亭在其上
也○熊耳平羗據其上流寰宇記云熊耳水一名熊
耳峽古老言武侯鑿山開道卽熊耳峽東古道也又
云平羗縣本漢平羗戍在榮州應靈縣界深谷戍是
也周保定年置縣隋大業中獠叛移就大江唐寶曆
中又移於開峽驛道書謂之平羗化山圖經云天下
二十四化之一也有太白亭在焉相傳太白讀書於
此黃魯直作亭其上蘇子瞻詩云峩眉山月半輪秋
影入平羗江水流謫仙此語誰解道請君見月時登

樓○石闕堂溪環遶其趾郡國志云龍游縣有二石
闕卽漢武帝使唐蒙下夜郎置碑目云嘉州舊市鎮
石闕上有唐李德裕領重兵過此九字寰宇記云石
堂溪水在縣東一里源出溪泉流入明月湖亭退入
流花橋會大江薛能石堂溪詩三面枕漁樵前門向
郡橋岸沙崩橘柚山徑入茶苗夜擁軍煙合春浮妓
舸邀此心無與醉花影莫相饒○九頂烏尤傑立捍
流方輿勝覽云九頂山在城左有九峰曰鳳集棲鸞
靈寶就日丹霞祝融擁翠望雲兌說唐會昌已前峰
下有寺今惟存凌雲一寺又名大像寺開元中僧海

通於瀆江沫水濛水三江之合衝濤怒浪之濱鑿山
爲彌勒大像高踰三百六十尺建七層閣以覆之至
韋臯時積十九年而工始備臯有大像記墨莊漫錄
云嘉州凌雲寺大像記韋臯文張綽書其碑甚豐字
畫雄偉頃於潘義榮處見之岑參詩寺出飛鳥外青
楓戴朱樓搏壁躋半空喜得登上頭始知宇宙闊下
看三江流天晴見峨眉如向江上浮迥野煙景豁陰
森棕枿稠願割區中緣永從塵外遊回風吹虎穴片
雨當龍湫僧房雲濛濛夏月寒颼颼迴合俯近郭寥
落見遠舟發槩無端倪天宮可淹留一官詎足道欲

去令人愁薛能詩像閣與山齊何人置石梯萬煙生
聚落一崦露招提霽月人來下殘陽鶴去棲從邊亦
已極烽火是沉黎司空曙詩春江古寺遶滄波石磴
盤空鳥道過百丈金身開翠壁萬龕燈焰隔煙蘿雲
生客到侵衣濕花落僧禪覆院多不與方袍同結社
下歸塵世竟如何李習凌雲漫興云古寺臨江間碧
波石梯深入白雲窠僧房寂寂無人跡滿地落花春
又過薛濤寄題凌雲寺上韋相公詩聞說凌雲寺裏
苔風高日近絕塵埃橫雲點染芙蓉壁是待詩人寶
月來黃庭堅凌雲記游詩凌雲一笑見桃花三十年

來始到家從此春風春雨後亂隨流水到天涯陸游
凌雲禮佛詩山郭尋幽一笑新旋呼艇子截煙津不
辭疾步登重閣聊欲今生識偉人泉鏡自涵螺髻綠
浪花不犯寶趺塵始知神力無窮盡丈六金身小果
身自註云一泉泓然正在髻下每歲水漲不能及佛
足○碑目云凌雲山麓有唐放生碑山頂有清音亭
邵博記天下山水之勝在蜀蜀之勝在嘉州嘉州之
勝在凌雲寺寺之南山又其勝也蘇子瞻名其亭曰
清音又南山之勝也其下有治易洞東坡磨厓大字
云聖作易晦其數劉傳吳識易祖蓋宋郡守吳秘得

之於劉牧耳○紀勝云烏尤山一名離堆山在九頂山之左舊名烏牛突然水中作犀牛狀至山谷題涪翁亭始謂之烏尤又名烏龍碑目云郭璞移水記謂世主播遷戎羯亂華於是優游笑傲放意山水間乃於嘉州城東百步烏龍山鑿書崑而蘇子由詩亦指其注爾雅於此史謂璞無入蜀之文按移水記有嘉州二字則碑非璞手筆恐後人之附會耳蓋嘉州之名始於後周而自周已前止曰漢嘉郡曰龍游縣耳安得有所謂嘉州哉子由詩云巉巉九頂峰可愛不可住飛舟過山足佛脚見汀滸俄頃已不見烏牛在

中渚移舟近山陰峭壁上無路云有古郭生此地苦箋註洗硯去殘墨遍水如黑霧至今江上魚頂有遺墨處提刑張方詩竹橋沙水度烏尤絕壁孤巖意氣驕故與凌雲分半坐僧窻假寐見金焦以其似金山焦山也○青衣石峽循而東去東觀漢記曰元初二年五月青衣蠻唐律歸義註云地在大江青衣二水之會今嘉州龍游縣也寰宇記云青衣津在治南四十里有青衣神益州記云神號雷埏廟卽華陽國志之雷垣也班固以爲離堆下有石室名玉女房蓋此神耳岑參上嘉州青衣山中峰題惠淨上人幽居寄

兵部楊郎中詩引云青衣山在大江之中屹然迥絕崖壁蒼峭周廣七里長波四匝有惠淨上人廬於山巔唯繩牀竹杖而已恒持蓮花經十年不下山予自公浮舟聊一登眺友人夏官弘農楊侯清淡之士也素工爲文獨立於世與余有方外約每多獨往之意今者幽躅勝槩歎不得與此公俱爰命小吏刮磨石壁以識其事乃詩以達揚友爾詩云青衣誰開鑿獨在水中央浮舟一躋攀側逕緣穹蒼絕頂詣老僧豁然登上方諸嶺一何小三江奔茫茫蘭若向西開我眉正相當猿鳥樂鐘磬松蘿泛天香江雲入袈裟山月吐繩牀早知清淨理久迺機心忘尚以名宦拘聿來夷獠鄉吾友不可見鬱爲尚書郎早歲愛丹經留心向青囊渺渺雲智遠幽幽海懷長勝賞欲與俱引領遙相望爲政愧無術分憂幸時康君子滿天朝老夫憶滄浪況值廬山遠抽簪歸法王或云青衣卽烏尤山然烏尤之廣不能以七里計也○方輿記云東巖在城東佛峽卽聖岡山薛能詩古蹟是何王平身入石房遠林通後逕一郡隔前岡晝靜惟禪客春來有女郎獨醒回不得無事可焚香巖半有洞出泉宜釀東坡詩一時付與東巖酒卽此陸務觀詩能仁院

前有石像高丈餘蓋作大像時槁也詩云江閣欲開
千尺像雲龕先定此規模斜陽徙倚空三歎嘗試成
功自古無○碑目云東津院有黃魯直草書圓照大
師小碑其詩云赤旃檀塔六七級白菡萏花三四枝
禪客相逢以彈指此心能有幾人知又云黃太史自
敘南經此有所作墨竹記○予觀嘉州新志城西一
里有揚雄山石洞幽邃相傳以爲子雲遊此有子雲
草亭蔡植詩云獨步城西路蕭條一草亭古苔環徑
碧修竹遶軒青石鑿觀書所碑鐫陋室銘草玄今已
矣千載想儀刑東北四十里有麻平河流出千佛崖

與泥溪合王勃麻平曉行詩云百年懷土望千里倦
遊情高低循戍道遠近聽泉聲礧葉纔分色山花不
辨名羈心何處盡風急暮猿清泥溪詩云弭棹臨奔
壑低鞭躡峻岐江濤出岸險峰磴入雲危溜急船紋
亂崖斜騎影移水煙籠翠渚山照落丹崖風生蘋浦
葉露泣竹潭枝泛水雖云美勞歌誰復知

峩眉縣

任豫益州記云峩眉山在南安縣界兩山相對狀如
峩眉張華博物志以爲牙門山也本傳云昔善財禮
德雲比丘時佇立妙高峰觀此山如初月現故稱峩

眉○李膺益州記云隋開皇九年立峩眉縣以山爲名縣在南安之西峩眉之東唐乾元間獠叛移就峩眉觀東今縣理是也○禹貢梁州之山四岷嶓蔡蒙西山皆岷北皆嶓南山皆蒙峩眉之在禹貢則蒙山之首也○飛玄羽經曰峩眉之山金臺之室飛玄羽經秘其內稽神樞云句曲洞天西通峩眉皆大道也其間有小徑雜路阡陌抄會非一處華陽國志云峩眉山孔子地圖言有仙藥漢武帝遣使者祭之欲致其藥不能得碑目云宋太宗峩眉山普賢殿簡版書天真皇人論道之地楚狂接輿隱迹之鄉按雜花經

云諸佛如來以大悲心而爲體故因於衆生而起大悲因於大悲生菩提心因菩提心成等正覺故我世尊等正覺而有方所說經而有道場普賢於道場開化人天等衆故現相海於峩眉山中密引世人而通菩提覺性○三皇經云皇人者泰帝之所使在峩眉山黃帝往受真一五牙之法○費士戮歌鳳臺記云按晉皇甫謐高士傳葛洪神仙傳宋劉孝標注世說皆以接輿爲避楚入蜀隱於峩眉不知所終也○寰宇記云中峩山在峩眉縣南二十里又名覆蓬山有葛仙洞入穴初纔容人行數里漸寬洞中蝙蝠大如箕

小峩山在峩眉縣南三十里一名鐔刃山山有季仙洞是爲三峩○李膺益州記云龍門山在峩眉西十里兩崖峭峙其形如削仰視青天纔餘一罅又云峩眉山下有池廣袤十里號龍池○方輿記云綏山廢縣在峩眉縣西四十里按列仙傳葛由周威王時人好刻木爲牛賣之一日騎木牛見人蜀中王侯追之上綏山綏山在峩眉山西南其高無極隨之者不復還皆得仙道諺曰得綏山一桃雖不得仙亦足以豪○水經註云峩眉山有濛水卽大渡水也水發蒙漢東西流與泝水合逕汶江道呂忱曰泝水出蜀許慎以爲泝水也從水泝聲南至南安入大渡水大渡水又東入江○通志云羅目河出峩眉山麓右溪自小天池以東左溪自黃毛坪以北至羅目廢縣界合二溪之委爲江水石甚奇怪縣址去治西九十里唐麟德置宋省入○寰宇記云隴寧山在羅目縣東南七里神仙傳云宿山圖者隴西人也採藥此山服之羽化○又云嘉樹在羅目縣東南三十里陽山江旣兩樹對植圍各三二尺上引橫枝亘二丈相援連理陰庇百夫其名曰黃葛號嘉樹蘇子由詩予生雖江陽未省到嘉樹卽此○又云夷惜水在羅目縣東北五

十里源出雋州界中有嘉魚長三尺每年二月隨水而下八月逆水而上入穴蜀都賦云嘉魚出於丙穴是也○予按名山記峩眉山周匝千里石龕百一十二大洞十二小洞二十八南北有臺凡遊大峩者自縣勝峰門出至華嚴院恰十五里前代於峩眉山朔寺六光相居山絕頂爲遊山之底極華嚴居山之前峰爲遊山之嚮導而白水寺居其中自白水至光相歷八十四盤山徑如線如是者六十里至峰頂卽普賢示現處屋皆以板爲之○予以萬曆辛亥歲遊是山作記云出嘉州之西門爲峩眉徑而峩愈用自遠遇津焉絕流者二揭衣者一旣入縣縣田食堰水膏液雲油有沃益之稱遇嶺焉閣覆於上宋時建魏華父書也首坡名解脫以出山者釋危就坦至此而盡噫予惡知乎出解脫入解脫耶過此爲華嚴寺卽華嚴堦爲純陽殿殿前頰谿有石如船水出灌堰石上龍門二字蘇子瞻書又過爲中峰寺卽乾明觀黃魯直居之爲歌鳳臺列仙傳所稱楚狂接輿隱于峩眉山中不知所終也陳希夷福壽字殊俗筆峩石神水亦亡謂又過爲雙飛橋山中橋非一此可稱橋一橋受一水一水自一洞來有黑白之分若挾而舞若搏

而赴勢不相下過橋始狎久之乃濟有石狀如牛心受水所激而成有前後牛心寺前者白水而後者黑水也謂之符文水孫思邈居于白水今之萬年寺卽白水寺由山下至寺一舍而遙倍之而近如循牆自牖以達堂窅每遇一嶺輒如止扉寺前爲四達而內則大宮也其地皆稻田塍埒俯仰隈隩氣候和暖不異於外有蒲氏村蒲人居之云漢蒲公之後蓋權輿是山爾出寺至明月池俗名初喜亭其嶺蔓延行之無盡石磴難數始治終亂騎已絕輿用二十許人昇蹲處于內不能蔽軫劣似輿形者耳首十人不任輿以舟視輿背如弓繩如絃猶不滿輿者意左右八人翼伸縮如猿臂莫知定向輿首者察路如察脉常苦眩次者如眩師或亟跳出輿外或俛入輿內或同前後左右爲一井計二十人之形如鴻雁木葉偶成文字莫知所以又或作十數層如懸線或擁腫一處如木癭也輿不可以足代足不可以手代扶予行者不善地以善讓于予善在左則棄右者善在右則棄左者亦有時而下下不十上之一輿相詬厲彌甚首者拊不任輿者背如相瞽然留十數人後後者躡石石隨足下擊前者足驚全輿前者交平地欲趨後者未

脫險不能從出初喜亭至化城寺俗名木皮殿徑一
嶺狹束如溝水所流注多磊砢善脫足謂之滑石溝
也由木皮殿至雷洞坪行者禁聲有禁聲碑與二十
人他輿者半共百五十人俱行篋篠灌莽中若不相
顧若夢與人語而人不應其木連困糾紛或寓或族
或相切磨或自弊死或翹繚而句或無枝而檄每上
一嶺不能半望若青天則有樹立於旁爲客繇役而
惺盱也木皮殿以上磴不能石疊木如馬齒雷洞坪
以上樹不能枝向空如虎爪由雷洞坪至天門石路
詰曲爲八十四盤峭直纔減半梧丘當途或出其前
或出其後又或出其左右而還之輿者實則輿向空
久始實輿者空則輿趾礪地有聲而過門以外爲娑
羅坪娑羅其葉冬青其花蒼蔔其色赤白木皮殿以
上皆有之然有雜樹故不之稱稱天門天門樹娑羅
三之二松居其一有一樹枯而復榮定者居之將合
無迹也門內有橋曰天橋有井曰井絡有臺曰光相
臺有鐵瓦殿昔建有銅殿今建有菴以棲禪者予登
乎臺焉其穆穆肅肅者耶其明明斤斤者耶其見乎
蒼蒼之色不在穹窿者耶其於世也悠悠洋洋者耶
前之岷江大出而尾下也背之瓦屋上正而平章也

遠之雪山濺浮而汨沒也予何以知朱明之別於玄
英又何以知臯且之別於辜涂何以知霾曠霏霖之
相終始何以知蟠竦挈貳之自消息又何以知弁日
覆雲之不爲暈氣五采耶又何以知人世之雕繪而
繡錯目眩而心亂者之有異乎此耶噫觀止矣學佗
曰予遊名山多矣直上百里無所因緣則未之聞見
也高出五嶽秀甲九州天竺先生之言也楚人李維
楨述于臺側李公本寧前予守西川也○陳子昂感
遇詩金鼎合神丹世人將見欺飛飛騎羊子胡乃在
峩眉變化固非類芳菲能幾時疲痾苦淪世憂悔日
侵淄眷然顧幽褐白雲空涕洟又浩然坐何慕吾蜀
有峩眉念與楚狂子悠悠白雲期時哉悲不會涕泣
久漣湏夢登綏山穴南采巫山芝探元觀羣化遺世
從雲螭婉變時永矣感悟不見之李白峩眉山詩蜀
國多仙山峩眉邈難匹周流試登覽絕怪安可悉青
冥倚天開彩錯疑畫出冷然紫霞賞果得錦囊術雲
間吹瓊簫石上弄寶瑟平生有微尚歡笑自此畢煙
容如在顏塵累忽相失儻逢騎羊子攜手凌白日鄭
谷峩眉山詩萬仞白雲端經春雪未殘夏消江峽滿
晴照蜀樓寒造境知僧熟歸林認鶴難會須朝闕去

祇有畫圖看賈島送譚遠上人下視白雲時山房掛
樹皮垂枝松落子側頂鶴聽棋清淨從沙劫中終日
未歛金光明本行同侍出峨眉釋皎然思遊峨眉寄
林下諸友詩剛有峨眉念秋來錫欲飛會拋湘寺去
便逐蜀帆歸難世堪言善閑人合見機殷勤別諸友
莫厭楚江薇曹松送僧入蜀過夏詩師言結夏入巴
峰雲水回頭幾萬重五月峨眉須近火木皮嶺上祇
如冬薛能咏峨眉聖燈詩莽莽空中稍稍鐙坐看迷
濁變清澄須知火盡煙無益一夜闌邊說向僧○予
有前後峨眉二歌前峨眉山歌金陵爲松谷上人作

云峨眉山上月千里若爲看峨眉山上雪萬古逼人
寒山青如黛雪如粉明月鏡中何隱隱雙峰縹緲誰
畫眉挂在長空不可盡西域雪山絕嶙峋此中應見
西方人普賢菩薩行具足三千徒衆皆應真始信我
眉自惆悵不作巫山神女身八十四盤娑羅樹花開
如繪復如素一間版屋千重嶺正值行人問山路登
山路轉難投寺日已晚古苔如髮長新松學蓋偃冰
窟炊不成雷洞眠難穩真僧入定久行脚乞食遠鉢
裏龍形小崑前鳥聲轉雨氣沉如墨雲光疾似電應
有千化身故作百寶現橋梁宛虹架樓臺疑蜃變天

竺皆騎象星光盡散燕奕奕九微燈焚焚五色線人
人爲攝受各各覩顏面欲知色是空色卽空中滅世
事如幻影詎必歎奇絕依舊峩眉山明月照清徹君
來白門秋山月幾圓缺浩浩江水流尚帶峩眉雪○
後遊峩眉歌云君不見太行誠險阻西蜀峩眉羞與
伍又不見雪嶺長晶瑩來映峩眉一段青禹貢蒙山
此稱首梵語勝峰傳日久洞天列在位之七秀色甲
乎州有九君不見軒轅氏跪謁皇人叩玄旨又不見
鬼谷子著書琅琅藏洞裏隴西仙人宿山圖採藥山
中顏色殊葛由賣羊從此去接輿歌鳳胡爲乎君不
見子規啼處竇誼悲夜啼竹裂人不歸又不見崑崙
伯仲未可分逸少曾詢周撫軍唐家子昂稱詞伯青
蓮居士李太白往往見諸吟詠間白頭欲返青山宅
豈是峩眉善妬人江水茫茫難問津我今來遊亦偶
爾不然惆悵蜀國將三春三春花已謝木冰猶未嫁
五月披重裘四時無一夏娑羅鬪雪開松枝受風亞
仙僧如故常客子驚云乍乍見甚遲迴人生不再來
足篆符文水身居光相臺井絡金莖下天門玉蕊開
願言獻北極千秋萬歲杯

夾江縣

青衣水來遶縣界而飛水溪注之溪源出瀑布泉狀如素練李太白所謂瀑布天落半與銀河爭流者耶而鳳凰天馬虎履伏龜諸山或舞或翥或蹲或處左右而挾持之過當縣城下稍平坦宋謝達夫詩兩峰懷抱揖平川張孝芳詩平川麥穗藹如雲過此而東南三十里乃作簾鈎之狀晉張神君所謂日移紅影在簾鈎者此也○道書云平岡化依鳳凰山亦謂之依鳳岡及桐梓林山下有石湫門及石筍雷柱可以禱雨在縣南十里○通志云天馬山其勢飛騰似天馬一曰馬鞍山在縣東二十里○形勝志云青衣水遶於南黑虎山峙於北○福地記云伏龜山有仙掌洞相傳李阿真人所遺宋人書其壁云跨龍門飲蟹泉摩仙掌扣丹竈矣○本志云治西二十五里南安鎮卽漢南安縣治有鄧通宅故址前有瑪瑙溪中有磐石可以脩禊○寰宇記云夾江縣本漢南安縣地卽封宣虎爲侯之邑隋開皇中分龍游平羗二縣置於涇上臨江水故號夾江按涇水昔秦惠王得蜀移秦人萬家以實之秦人思故鄉水乃呼此水爲涇水也唐天寶六年改爲秦水史記年表宣虎以破臧荼功食邑於此○碑目云漢和帝時開道碑在夾江縣

西青衣越雋道界中有永和七年永和八年等字○
又云漢楊宗楊暢墓在夾江縣東十里墓前兩闕其
左右皆隸書縣按縣東二十里漢川縣界有亭亭內
碑二通前立二石柱一云漢故益州太守楊府君諱
宗字德仲墓道一云漢故中宮令楊府君諱暢字仲
普墓道皆隸書大字○予按揚雄賦云五兀參差左
太冲賦躡五兀之蹇澹本志以爲縣之北隅五兀山
○後漢書費貽宅著草生焉常有五色雲氣覆其上
貽蓋不屈於公孫述者犍爲郡之夾江人

洪雅縣

離堆川流東西屈曲百三十里而後入大江所謂洪
雅川也○碑目云古夷獠誓碑在洪雅縣市中又云
漢靈帝時張道陵碑在洪雅之易俗鄉有嘉平二年
三月一日等字○此縣之十里脩文山山卽雅江所
注驚湍怒濤名曰龍潭漁者不敢入○又二十里其
地多竹爲竹箐山石甃梯磴盤折而上唐宋所設也
○又十里爲隱蒙山晉處士龐居正字隱蒙隱此○
又二十里爲花溪發源自瓦屋山與青衣合可望雪
嶺積雪經年不化范忠宣詩雲堆雪嶺鋪銀界日射
金仙照碧津○又廿里思經山則與雅安分界矣山

蜀中名勝 卷之二十一 二十一
趾有廢嚴道縣基其上阿叱山瀑布千仞響撼山谷
有巨石上鐫羅漢一百有八○縣之東南有金釜山
下臨平羌江古老相傳昔有主簿於此煉金丹故曰
金釜山亦名主簿山

犍爲縣

左思蜀都賦東越玉津註云江出璧玉故名華陽國
志蜀有七津之一也今之犍爲縣兼有玉津縣矣陸
務觀舟過玉津詩玻璃江上送殘春疊鼓催帆過玉
津宋白爲玉津令貽田表聖詩玉津縣裏三年悶金
粟山前九月愁又云竹裏衙人吏花間押簿書○今

縣治在沉犀山上寰宇記云昔有犀牛渡到此上沉
一名沉犀灘志云沉犀洞在沉犀山下上有赤壁數
丈下有玄水千尺○縣有石人蜀記云昔諸葛亮征
蠻中十里刻一石人今黎雋之路尚有存者陳羽城
下聞夷歌詩犍爲城下牂柯路空冢灘西賈客舟此
夜可憐江上月夷歌銅鼓不勝愁○郭璞記云犍爲
縣北百里書樓山是孔子背書樓○本志云子雲城
在縣南三十里昔揚子雲避亂於此後人增築爲城
今水月寺是其故址俗譌爲紫雲城○碑目云孝女
碑在犍爲縣清溪口楊洪山下東漢永建初孝女叔

先雄以父尼和墜湍水尸喪不歸於溺處自投水死
後五日與父屍相持浮江上郡表言爲雄立碑宋元
祐中重立本志云清水溪在縣南十里流至孝女渡
入江○神異傳云趙昱嘗隱青城山隋煬帝起爲嘉
州太守時犍爲潭中有老蛟爲害昱率甲士千人夾
江鼓譟持刀入水有頃江水盡赤昱左手執蛟首右
手持刀奮波而出隋亂隱去不知所終後嘉州水漲
人有見昱青霧中騎白馬從數獵者於波而過宋太
宗封神勇大將軍廟食灌江口○碑目云犍爲縣東
南四十里有唐大佛寺寺中菊坡二大字乃袁天綱

筆○通志云宋邵博墓在犍爲縣博爲制置司叅議
卒葬於此本志云康節嘗言世亂惟蜀可居宣和末
伯溫攜家入蜀止於嘉州今犍爲之紫雲城是其故
業矣○杜甫宿青谿驛奉懷張員外十五兄之緒詩
漾舟千山內日入泊荒渚我生本飄飄今復在何許
石根青楓林猿鳥聚儔侶月明遊子靜畏虎不得語
中夜懷友朋乾坤此深阻浩蕩前後間佳期付荆楚
自註云青谿驛在嘉州犍爲縣崔塗秋日犍爲道中
詩久客厭岐路出門吟且悲平生未到處落日獨行
時芳草不長綠故人無重期那堪更南渡鄉國已天

涯范成大犍爲江樓詩河邊堵立看歸篷三老開頭
暮欲東漲水稠灘連峽內淺山浮石似湘中無人驛
路榛榛草有客江樓浩浩風種落塵消少公事賸栽
新語寄詩筒蘇軾犍爲王氏書樓詩樹林幽翠滿山
谷樓觀突兀起江濱云是昔人藏書處磊落萬卷今
生塵江邊日出紅霧散綺牕畫閣青氛氲山猿悲嘯
谷泉響野鳥嘒憂巖花春借問主人今何在被甲遠
戍長苦辛先登搏戰事斬馘區區何者爲三墳書生
古亦有戰陣葛巾羽扇揮三軍古人不見悲世俗回
首蒼山空白雲

威遠縣

縣有中峰峰巒峭拔又有中溪溪水幽清寰宇記云
東十五里葛仙山古志相傳葛仙翁曾遊其地志云
舊設觀仙臺碑刻剝落矣○山居錄云威遠李圃淳
熙中以忠州別駕歸隱白茅山中築秀發齋吟咏自
適齋銘曰前山特秀入我牕戶朝來爽致起我幽趣
望天宇之澄明何迷途之獨悟搢願終日爲蝶爲周
兩忘之矣聊舉扇以自障豈世塵之能汚行歌山中
採其薇矣雲外飛鴻悠然來去而弋人何慕哉

榮縣

蜀地不宜松而榮州之松獨著紀勝曰榮黎松樹如龍盤陸游詩枿根橫走松倒植故擅有其奇狀矣○曰榮黎曰榮隱曰榮德所謂三榮也寰宇記云榮黎山在州東十五里山上有龍池池邊有松如盤龍竹亦有如龍形者俗謂之羅漢杖碑目云榮黎山古寺碑唐元和禱雨碑俱在本山○紀勝云榮隱山在州西三十里一名石筠無名氏石刻云筠山高極入穹蒼人道虎爲殃行人過此不曾傷咸陽宮闕在平地高鹿食人無數計吁嗟苛政猛於虎斯言垂萬古古有榮隱先生修道於此石室猶存碑目有榮隱山修

道觀石碑○方輿云榮德山在州東北四十二里州以此得名其山在谷中獨拔五百餘丈中有希夷觀老君祠刻石爲像有小路至山巔以木爲梯半山有唐刺史薛高丘磨崖碑碑目云開元二十年刺史薛高丘立多載僊靈事今已磨滅本志云榮德山爲陳搏修真處又名希夷山有石室二十四及龍池千葉蓮○唐劉兼初至郡詩嘉陵江畔接榮川兩岼旌旗下瀨船郡印已分炎瘴地朝衣猶惹御爐煙蓮塘小飲香隨艇月榭高吟水壓天錦字莫嫌歸路遠華夷一統太平年又有去年今日詩云去年今日到榮州

五騎紅塵入郡樓，貔虎只知迎太守。蠻夷不信是儒流，奸豪已息時將泰。疲瘵全蘇歲又詩，聖主若容辭重祿，便歸煙水狎羣鷗。○碑目有唐貞元二年建榮縣碑，今移植於東橋。有榮州院碑，僞蜀司倉參軍苟延慶撰。本志云：蓮宇山在學宮後，有宋人九域圖碑。城東桂林山舊縣學有衡陽王書文明碑。○碑目又云：真義侯碑在本廟。唐元和二年遷舊經，卽古蜀將獨孤白馬二人廟也。又云：大周聖德勒石碑在州衙子城門外。長安三年韋緝撰文。○劉兼登郡樓詩：偶奉綸書蒞旭川，郡樓佳致盡依然。松欹鳥道雲藏

寺，月滿漁舟水浸天。望帝古祠花簇簇，錦城歸路草芊芊。有時倚檻垂雙袂，故國風光似眼前。○陸務觀自序其詞云：三榮郡治之西，因子城作樓，觀曰高齋。下臨山村，蕭然如世外。予留十日，被命參成都戎幙而去。臨行，徙倚竟日，作桃源憶故人一首，所謂衰翁老去，疎榮利絕，愛山城無事也。○城北有橫溪閣，務觀閣上小宴，沁園春詞引云：橫溪閣者，跨于雙溪之上也。一自西來，其水濁；一自東來，其水清。二水合流於城下，爲閣以頰之。其北鳳鳴山，則黃魯直所題。榮川祖無大師此君軒在焉。紀勝云：鳳鳴之竹多茂實。

言此竹結實有鳳來棲也魯直詩云王師學琴三十年響如清夜落澗泉有酒如澠客滿門不可一日無此君當時寺栽數寸碧聲挾風雨今連雲此君傾蓋如故舊骨相奇怪清且秀程嬰杵白立孤難伯夷叔齊采薇瘦霜鐘堂上弄秋月微風入絃此君說君家周彥筆如椽此君語意當能傳○勝覽云龍洞在州東南四里真如院巖穴峭深洞左石壁奇聳巨栢老蒼洞右有石角立舊經以爲孫登嘯臺三者乃榮之勝處陸游詩嘯臺載酒雲生屨仙穴尋梅雨墊巾碑目云嘯臺磨崖記宋隆興元年端午日榮守太史公

李燾仁父書○予攷諸傳記所載榮雖山谷間實爲郡國一都會青陽門記云榮州有青陽洞以少昊國在其北門今正臨之故名按史黃帝子玄囂封于青陽國爲少昊金天氏少昊降居江水國于青陽以金德王位在西方集覽云江水在蜀青陽是也○宋崔仰之送人牧榮州詩山色臨巴迥江流入漢清○志云邑東榮川卽古遜水河岸有竹王祠蓋以祀夜郎王者蜀記云昔有女人於溪浣紗有大竹流水上觸之有孕後生一子自立爲王以竹爲姓漢武使唐蒙伐牂柯斬竹王土人不忘其本立竹王廟歲必祠之

不爾爲人患薛濤題竹郎廟云竹郎廟前多古木夕陽沉沉山更綠何處江村有笛聲聲盡是迎郎曲○漢地理志云縣有滇池周迴三百里水出駿馬日行五百里事同大宛又有馬鳴戍益州記云漢刺史韋拔夜過此地聞神馬嘶漢中馬嘶以應之故有此戍○成都市九州要記云和義郡古夜郎之地武帝時開南中使爨道令通爨青衣道無功唐蒙將殺之令曰恨不見成都市而死蒙卽立市如成都以殺之故曰成都市按和義郡本屬瀘州寰宇記云唐貞觀八年割屬榮州○志云城西清富山有古榮王府按

周榮公封國之後唐憲宗封其子憤宋真宗封子德雍孝宗封子光宗寧宗封子曦俱曰榮王縣舊有綾錦村杏春村皆宋藩封故迹也○朝野雜記天子卽位嘗所領州鎮自防禦州而下皆陞軍名若節鎮州則建爲府光宗自榮州刺史進封榮王而榮州不錫軍名蓋中書之誤也南渡後始陞爲紹興府○宋名臣傳載李昉爲國子直講求郡晨登講席諸生見昉巾兩焰火起是日報得榮州蓋當時亦甚重之矣

蜀中名勝記卷之十一

終

蜀中名勝記卷之十二

閩中曹學佺能始著

眉州

賈島送穆少府知眉州詩劍門倚清漢君昔未曾過
日暮行人少山深異鳥多狄啼知峽雨棧盡到江波
一路白雲裏飛泉洒薜蘿李頻眉州別李使君詩回
首雪峯前朱門心杳然離人自嗚咽流水莫潺湲毒
草通蠻徼秋林近漏天一生從此去五字有誰憐薛
濤送鄭眉州詩雨暗眉山江水流離人掩袂立高樓
雙旌千騎駢東陌獨有羅敷望上頭趙抃按獄眉山

舟行詩携琴曉出錦官城千里秋原一望平放舸急
流身覺快披雲孤嶼眼增明農田雨後哇哇綠漁笛
風前曲曲清訊獄遠邦先滌慮卹哉休戚在民情蘇
軾寄黎眉州詩膠西高處望西川應在孤雲落照邊
瓦屋寒堆春後雪峨眉翠掃雨餘天治經方笑春秋
學好士今無六一賢且待淵明賦歸去共將詩酒趁
流年黃庭堅次韻子瞻寄眉山王宣義詩參軍但有
四立壁初無臨江千木奴白頭不是折罾具桐帽棕
鞵稱老夫滄江鷗鷺野心性陰壑虎豹雄牙鬚鸚鵡
作裘初服在猩血染帶鄰翁無昨來杜鵑勸歸去更

得把酒聽提壺當今人材不乏使天上二老須人扶
兒無飽飯尚勤讀婦無複禪且著襦社甕可漉溪可
漁更問黃鷄肥與癯林間醉着聞伐木猶夢官下人
追呼萬釘圍罾莫愛渠富貴安能潤黃壚○郡有孫
氏書樓魏了翁記曰孫氏屈眉以姓著自唐迄今人
物之懿史不絕書而爲樓以儲書則由長孺始樓建
於唐之開元至光啓元年僖宗御武德殿書書樓二
字賜之今石本尚存自僞蜀毀於災乃遷魚鰈其屈
爲佛氏所廬今所謂傳燈院是也若里巷則固以書
樓名長孺之五世孫降衷嘗遊河洛識藝祖皇帝於

龍潛建隆初召至便殿賜衣帶圭田特授眉州別駕
因市監書萬卷以還然樓尚未復也別駕之孫闢乃
入都傳東壁西雝之副與官本市書捆載而歸即所
居復起重樓藏之魚鱗之有樓則昉乎此又嘗除塾
爲師徒講肄之所號山學于是士負笈景從而書樓
山學聞名於時矣方樓之再建也在天聖初闢之從
兄直講君堪嘗爲作記錢內翰希白宋景文子京皆
賦詩闢性倜儻不耐衣冠衣方服其卒也從弟文懿
公爲識其窶有不儒其身而儒其心之語故里人又
以儒心名之比歲樓又燬于火書僅有存者儒心之

六世孫曰某懼忝厥世乃更諸爽塏以唐僖宗所書
樓刻揭之樓視舊增拓焉且病所儲之未廣走行闕
下傳抄貿易以補闕遺竭其餘力山學載興以余二
十年雅故請書厥顛末余因惟昔人藏書之盛鮮有
久而弗厄者梁隋之盛或壞于火或覆于砥柱唐太
玄文昭之盛或毀于盜或散于遷徙本朝之初如江
源叔所藏合江南吳越之書凡數萬卷而子孫不能
有之爲臧僕盜去與市人裂之以藉物者不可勝數
余偶過安陸亦得其省中所藏晉史則佚于他人者
可知安陸張氏得江書最多其貧也一篋之富僅供

一炊王文康初相周世宗多得唐舊書李文正所藏亦爲一時之冠而子孫皆不克守宋宣獻兼有畢文簡楊文莊二家書可敵中秘之藏而元符中蕩爲烟埃晁文元累世之蓄校讐是正視諸家爲精自中原無事時已有火厄至政和甲午之災尺素不存劉壯輿家于廬山之陽所儲亦博今其子孫無聞焉南陽开氏積書凡五十篋則盡歸諸晁氏嗚呼斯非天地神人之所靳者耶而孫氏之傳獨能於三百年間屢絕而復興則斯不亦可尚矣夫雖然余嘗聞長老言書之未有印本也士得一書則口誦而手抄惟恐失

之其傳之艱蓋若此惟傳之艱故誦之精思之切辨之審信之篤行之果自唐末五季以來始爲印書極於近世而閩浙庸蜀之鋟梓編天下加以傳說日繁萃艱益廣大綱小目彪列肝分後生晚學開卷瞭然苟有小慧纖能則皆能襲而取之噫是不過出入口耳四寸間爾若聖賢所以迭相授受若合符節者果爲何事而學之於人果爲何用則謾不加省然則雖充厨牝儿於我何加焉可不甚懼矣夫按書樓復興雖在魚耶江而始剞則在州城也今蜀中書賈之家往往稱書樓蓋本諸此○有石氏畫苑蘇軾記曰石

康伯字幼安眉之眉山人故紫微舍人昌言之幼子也舉進士不第卽棄去當以蔭得官亦不就讀書作詩以自娛而已不求人知獨好法書名畫古器異物遇有所見脫衣輟食求之不問有無居京師四十年出入閭巷未嘗騎馬在稠人中耳目謾謾然專求其所好長七尺髯而黑如世所畫道人劍客而徒步塵埃中若有所營不知者以爲異人也又善滑稽巧發微中旁人抵掌絕倒而幼安淡然不變色與人遊知其急難甚于爲己有客于京師而病者輒昇置其家親飲食之必則棺斂之無難色凡識幼安者皆知其如此而余獨深知之幼安識慮甚遠獨口不言耳今年六十二狀貌如四十許人須三尺郁然無一莖白者此豈徒然者哉爲亳州職官與富鄭公俱得罪者其子夷庚也其家書畫數百軸取其毫末雜碎者以冊編之謂之石氏畫苑幼安與文與可遊如兄弟故得其畫爲多而余亦喜其畫古木叢竹因以遺之使置之苑中○有三蘇祠在紗線街卽蘇氏故宅也門前榆樹云老泉手植奇恠礪礪人爭取去爲假山魏了翁知眉時祭公文曰眉號士大夫郡聖天子不以某不肖莫守此土其在境內凡百辟卿士有益于民

夙夜承祀無忒矧惟山川炳靈世載蘇氏一翁二季
先後相望文章事業在太史之典策今居郡滿歲顧
歲時奉嘗闕然弗諧非所以風境律我有民也用修
圭薦展於廡下以內翰太師文忠公黃門太師文定
公從祀既齊既稷神保攸歆敢不永與多士承斲斯
文以無忘德○有觀蓮亭在祠西池中環臺皆蓮中
有碑刻東坡小像李龍眠畫山谷穎濱贊今移入寢
○方輿勝覽云臨風閣在州治內宋沈迥詩烟霞生
座右林沼匝城隈州園十詠邵博著環湖在署後魏
了翁築翠羽書臺遠景樓在州治北太守黎錞建蘇

軾記通志云雪臺在遠景樓前亦希聲築○本志云
東北二里有洛城後漢時築蜀漢廢齊通城在城北
南齊建武置隋開皇廢碑目云唐眉州荆羅城記大
順二年盧拯撰文畧云象耳鎮于後峩眉列乎前勝
覽云嘉祐閣枕羅城繪三蘇于上刻東坡和陶詩於
壁間宋史唐末山行章攝眉郡守值四方驛騷乃合
五縣之力築城周遭八里有奇計一千八百六十五
丈名卧牛城淳化中李順之變攻圍不下及順誅守
者以城完受賞焉○通義志云昔人評吾州山不高
而秀水不深而清列眉通衢平直廣衍夾以槐柳綠

陰翳然小南門城村家多竹籬桃樹春色可愛橋之
下流皆花竹楊柳泛舟其間鄉人謂之小桃源蘇子
瞻詩清江入城郭小圃生微瀾子由詩彷彿城南路
繁香撲市橋○通志云醴泉山在治西八里環繞州
城山半有八角井清甘如醴松江在治東南自蜀江
分派西南流至州城與醴泉江合○方輿云蜀江在
城外一名玻璃江水色清澈似之陸游詩云玻璃江
水千丈深不如江上離人心君行未過青衣縣妾心
先到峨眉陰金尊共釀不知曉月落烟渚天橫參車
輪無角留不住馬蹄不方何處尋空憑尺素寄幽恨
縱有綠綺誰知音愁來只欲掩屏睡無奈夢斷聞疎
砧范成大和云玻璃江頭春流深別時泔泔流到今
祇言日遠易排遣不道相思翻苦心烏頭可白我可
去菖花易青君易尋人生若未免離別不如碌碌無
知音蘇軾送楊孟容詩我家峨眉陰與子同一邦相
望六十里共飲玻璃江後人因立共飲亭又改爲江
鄉館在津口矣陸務觀詩玻璃江上柳如絲行樂家
家要及時只恠今朝空巷出使君人日宴墓頤墓頤
山在江東七里狀如墓頤因名有至德觀有爾朱洵
丹泉傳記所載以爲軒轅氏丹宅山腹有穴曰龍洞

傳者以爲四目老翁唐末有楊太虛得道於此今祠
中有三仙象四目居中焉人日出東郊渡江遊墓願
山眉之故事也春風樓明霞閣俱在山上○蜀檮杌
云僖宗幸蜀政事悉出內侍田令孜之手左拾遺孟
昭圖上疏論事坐貶令孜遣人投之墓願津後人爲
立祠裴澈詩云一章何罪死何名千載惟君與屈平
從此蜀江烟雨夜杜鵑應作兩般聲本志云孟拾遺
祠在墓願山上今廢○志又云老翁泉在墓願山東
二十里蘇明允嘉祐集云十數年前月夜有一老翁
蒼頭白髮偃息泉上就之則隱而入于泉洵甃以石

建亭覆之而爲之銘曰山起東北翼爲南西涓涓斯
泉溢溢以彌歛以爲井可飲萬夫里無斯人將此爲
誰山空寂寥或嘯而嘻更千萬年自潔自好誰其知
之乃訖遇我惟我與爾將遂不泯無竭無濁以永千
祀梅聖俞寄蘇明允詩泉上有老人隱見不可常蘇
子居其間飲水樂未央淵中必有魚與子自徜徉淵
中苟無魚子特翫滄浪日月不知老家有雛鳳凰百
鳥戢羽翼不滯彼泉傍○蘇軾送賈訥倅眉二首云
當年入蜀嘆空回未見裁眉肯再來童子遙知頌襦
袴使君先已洗樽壘鹿頭北望應逢鴈人日東郊尚

有梅我老不堪歌樂職後生試覓子淵才又云老翁山下玉淵迴手植青松三萬栽父老得書知我在小軒臨水爲君開試看一一龍蛇活更聽蕭蕭風雨哀便與甘棠同不翦蒼髯白甲待歸來自註先君葬于墓頤山之東二十餘里地名老翁泉君許爲一往感歎之深故及之也外史玄羽張大齡志云歐陽永叔爲明允作志銘云公葬于彭山之安鎮鄉可龍里在今墓頤山之東地名石龍柳家溝老翁泉之側或石可二字易誤嘉靖壬子臺史喻公按眉間老泉墓檄有司求所在而修復之上下彭眉間數月竟無所得

於是從老翁泉之傍設一虛塚青神余修撰承勛記其事于石又有廣福寺者乃勅賜門下侍郎蘇轍香火院也宋故事宰相得賜寺院薦福文定入相時有賜貶官後章呂盡追奪之復官手詔再賜自爲文記之人以爲墳必在賜院之近又乃就寺之後山更作一塚顧穎濱記中云墳之西南十餘步有泉焉廣深不及尋晝夜瀆湧又曰墳東南四里許有故伽藍轍以請于朝則前所修泉傍者差是而廣福之墳非也但廣福傍有古桂樹橫陰一畝大十圍亦非近代物若明允之族譜亭則在州西南古修文鄉蘓氏祖塋

側今亭廢刻石亦不存矣○碑目云天池院去眉山縣十里蘇文忠公嘗過之今柱上有手書云自老翁井還偶憇治平丁未十二月七日子瞻凡十八字○勝覽云石佛山在眉山之南蘇子瞻寄子由詩石田向何許石佛山下路下有爾家山千畦種秔稌山泉宅龍蜃平地流膏乳志云猪龍泉在治南石佛鎮曾有乳猪伏于此化二鯉蓋猪龍也詳見恠異記中志又云孫抃墓在石佛鎮乾明寺前按乾明寺在魚耶鎮孫學士書樓山學碑藏寺中卽宋賜孫公抃薦福地也○志又云大旺山在東南五十里自墓頤山南趨或起或伏至此峰巒屹立迴拱州城蓋與三峩氣接矣○勝覽云息臺山在治西四十里東館鎮北太平廣記載眉州有叟嘗携子入此山遇一道人指其子曰天叟飲道人已長跪求壽道人取簿檢視曰壽止十八叟與其子懇求不已乃舉筆改爲八十後子壽果如數焉○志云大明寺近東館鎮隋建有九樓十八殿屋厦三千井亦四十八眼基跡猶存又有燈壁寺在東館鄉宋紹興建有東館書院紹興初眉州學者甚多州學不能容東館鄉士大夫呂君玘倣古鄉校剏爲學廟春秋釋奠以鄉士夫居家者王之丹

稜令馮時行爲之記○志又云連鰲山在西南九十里山形如鰲傍卽栖雲寺東坡少時讀書寺中嘗于石厓上作連鰲山三字大如屋宇雄勁飛動其畫專車今存

青神縣

益州記曰青衣神號爲雷埴廟班固以爲離埴也蜀江至此始有峽之稱華陽國志望帝以熊耳爲後戶熊耳峽卽今之縣治矣郡國志云漢武帝使唐蒙破西南夷路始於此邑也○志云青州城梁置在治南十五里古青神郡縣皆治此自熊耳山視之今當爲

百花鎮黃山谷集云青神尉廳葺城頭舊屋作借景亭下瞰史家園水竹終日寂然了無人迹又當綠陰之間戲作長句云當官借景未傷民恰似鑿池取明月蓋尉乃雅安張禮介卿山谷之中表也○志云縣東門外有青羊橋相傳老子騎青羊過此而入成都又云長泉鎮有麒麟橋王蜀時麒麟見于此因立麒麟院又云縣西瑞草橋橋崩得殘碑乃蘇東坡與丈人丈母書也東坡外家在是所謂相望六十里共飲玻璃江矣後洪雅王簿王宣義謝事家居于此東坡贈之詩云歸來瑞草橋邊路獨遊還佩平生壺○

之名勝在乎三巖三巖者上巖中巖下巖也今惟稱中巖焉自縣解維始由芙蓉溪以兩岸多芙蓉也繼由五渡溪以溪水曲折凡五渡也又過慈姥磯有石刻李壁詩云洗盡一春歌酒塵滄江吹破碧粼粼韶華過眼都如夢祇有三峯是故人泊舟直抵下巖有題名云子瞻子由與侃師至此院僧以路險見止不知僕之所歷有百倍于此者矣丁未正月二十日書沿溪數折有喚魚潭上卽慈姥岩也篆刻中巖二字徑可四尺河南邵博書陸務觀詩云春枕悠然夢何許兩枝筇杖喚魚潭又跋程伯正誼所藏山谷帖

云此卷不應携在長安逆旅中亦非貴人席帽金絡馬傳呼入省時所觀程子他日幅巾筇杖渡青衣江相羊喚魚潭清泉翠樾之間與山人掃石置風爐煮蒙頂紫茁然後出此卷共讀乃稱爾過潭循山三里始至寺爲中巖其傍有羅漢洞卽牛頭僧以木鑰叩石筍處此地懸崖峭壁上刻千佛石覆如屋中有卧仙之迹有玉泉坎黃山谷銘云玉泉坎坎來自重險發源無所龍口琬琰我來峽中初酌蛙領靈湫世鮮百泉莫與比甘山僧淳拙煮餅馨香遠拂瀾茗泉味不揜行爲白虹止爲方鑑口題此德用勒蒼石其

上巖去中巖一里許唐末有佛刹號垂拱寺相傳巖
下有龍聽僧講經于此由是建寺有三石筍唐無盡
禪師伏虎在石筍下所謂伏虎臺也范成大詩赤巖
倚竚峭翠邏森成削岑蔚嵐氣重稀間暑光薄聊尋
大士處往扣洞門鑰雙撐紫玉關中矗翠雲幄應供
華藏海歸坐寶樓閣無法可示人但見雨花落不知
龍湫勝何似魚潭樂夜深山四來人靜天一握驚看
杯桂白月影到林壑門前六月江世界塵漠漠寶甕
有甘露一滴洗煩濁捫天援斗杓請爲諸君酌○山
谷題名云元豐庚辰歲秋多雨其八月戊午晴遊慈

姥巖禮諾巨那尊者巖下有泉發山足奔突色如乳
而味甘取之不竭豈巨那所奉供耶余因竭其舊水
涓滌見石少焉復盈坎灑灑投澗中喚魚潭投齋餘
飯魚出食者數百見人不驚○眉山程逢時跋余玠
詩云相公平賊後携吏上崢嶸裴晉公以後無此奇
遇醉翁行樂處草木皆可敬歐陽子而後世無此樂
先生晉公德業文忠詞章書史精妙視鍾王有逸氣
而於山林悠然心會殆伯仲之間有裴歐也試語山
靈自有宇宙便有此山幾曾有此客耶○邵溥來紹
興元年五日旦從其弟博任也○資中張方自漢川

易節益部將母游弟嵩午猶子觀復二子知復甥何
杓侍眉山蘇禮偕來嘉定壬午二月既望○金華楊
緯被命赴闕艤舟巖下敬修尊者香火而去紹熙壬
子孟冬九日弟綜及男師復師晉同至○河陽郭忠
得之行部嘉眉艤舟岩下携子游中巖瞻拜尊者過
憇石筍庵歷覽勝境竒哉政和八年六月三日○里
人任逢被旨赴闕長子商輅侍行親友送別筭峯者
三十有九人嘉定丁丑十月癸酉○邑人楊大全被
旨進朝將家來修淨供宗黨親朋會別于此者五十
五人紹熙三年九月旦○谷居翁大丞相趙公留題

淳祐壬子鄉貢方于此題名巖寺奎書適從天來是
秋楊巽冠外省史夢錫在選中以山英靈發越愈大
浚儀趙公握奎平岡繼偕南宮第一之客明年端午
合邑士楊興仁申錫柄仲夢炎懌森孫侯國史朝瑞
彪錫王鉞文起之巽已程方何明磨崖大書以侈盛
舉以開方來○慶元戊午冬高公純遣姪魏了翁赴
龍飛策試艤舟來遊男載夏卿文卿定子姪遊侍行
越三年載定子褫褐行都復侍親過此弟夏卿文卿
林卿長弟淞同山下飲作伴留又二年癸丑秋十月
了翁蒙恩召除侍東去舍于眉信于青衣明日孫真

勤飲錢于此兄弟之偕行者如戊午獨伯仲不與紹
定巳丑六月丙午○郡人蘇薰侍諸父率四弟以嘉
定戊寅上元日游誦坡翁江山風月本無常主間者
便是主人語信然也弟黨書○愁霖貫序人心久鬱
秋季之旦晴景開霽草木悅茂江山清新太子宮史
籍聖源命前王穆伯恭及前進士楊穎臣廷芳進士
程戩景貺羽衣李有慶仲祥出邑東津亭方舸南下
登石徑數里遊中巖僧居清晏薄暮間道而歸試校
書郎領簿馮越石君玉俾識其時乃嘉祐丁酉之歲
也景貺題○辛亥歲予友楚人鍾惺來遊作記云去

青神西南十五里江色盡綠玉中邊皆見隔岸坐立
數山若架閣者中巖也巖下上連延可十數里許迴
流峻壁冥壑複磴竹樹蒙籠大要向背徃復皆與此
巖終始渡江即水月樓樓趾齧江寺冠之由樓視江
則已頽由寺登樓乃反降階垂窮與樓湊階代樓爲
梯者強半揣本齊末度樓之腰猶未能至乎寺趾也
降自樓出山門右行不見江則摩磴如蟻屢折爲喚
魚潭魚聽掌出石壁百仞立而微頰潭漱其脛石無
完膚有邵伯溫大書可模並壁行數武爲羅漢洞洞
低曲僂而入如行牛角中隙處稍右則爲伏虎巖鑿

巖爲百千萬億佛如恒河沙數巖之半跨壑爲一小石橋銜木其壁爲閣若居人架竹梁上以承燕巢者人屈曲行其下沿綠洞壑俯仰竹石者數里曰此走井研富順道也巖又半爲流杯池一曰太極池有屋數楹屋後爲泉泉流洞中石壁四周有黃魯直大小三石刻壁間宋元刻頗多每兩石縫接處徃徃上下各截其半中嵌俗筆亦有居石隙苟完者出洞緣磴行輿步歎代去所謂羅漢洞伏虎巖者度可四三里乃復覩前鏡巖佛像須眉歷歷可數才隔一壑尋橦可度疑前此一段途徑可省矣大抵喚魚潭以徃行皆壑石壁夾之若岍壑若溪藤蘿虧蔽壑中若荇藻老樹如槎根若石猿鳥徃來若遊魚特無水耳諸峰暎帶時讓時爭時違時應時拒時迎哀益避就準形匠心橫豎參錯各有妙理不可思議又行里許蹭蹬拾級乃睹古中巖題額去三石筍不遠所謂諾詎那尊者引牛頭僧持鑰扣石筍筍開得低頭佛盜珠是也鍾子曰自中巖至尊者巖從下視上頂踵腹背其石脈皆當爲筍筍隙且平處則置屋仄則鑿磴斷則爲橋處危臨深則設石欄欄則復見江從江中望岩上僧舍佛刹雖一居之內前軒後寢纍纍綴高壁上

下疊而不覺其前後通也登岩行屋中皆磴道乃稍
得其要領趾後竟卽摩前頂石笋中分處如一門尊
者像處其中右旋復爲佛殿殿傍一笋屹若浮屠
中分者而三實一笋也人直指其巋然三峰者爲石
笋耳笋上宋元刻亦多俗書災石者亦復倍之萬曆
辛亥十月二十一日晚霽與弟恬及艾子登于中岩
焉禮諾詎那尊者畢說偈偈曰偶爾喪珠復返急時
扣鑰相求未免勞勞多事世尊不合低頭又曰未必
衣珠真失總緣岩石當開自供羅漢遊戲不管山僧
往來說偈訖返○予凡三過中岩皆有詩其一云中

巖如化出秀色類烟舍到鳥無歸路游魚或泳潭泉
聲隨地有石筍與天叅若作此山長于心無不堪其
二云再識中岩好彌添乍到清泉流因委曲雨氣益
淒清橋險必當度樓虛何所成唯應石筍上安坐學
無生其三云莫謂客來數聊無塵俗牽岩光浮落日
梅意入初年手搨碑文古身行洞穴連白魚灘寂急
且宿在灘前蓋予寂後游同青神令康君視搨山谷
諸碑刻又自梓州牛頭洞來故及之

彭山縣

揚雄蜀記秦惠王遣張儀司馬錯伐蜀蜀王開明拒

戰不利退走武陽獲之卽此地也郡國志云漢元光四年益州刺史任安城武陽周圍千三百丈本志云今之舊土城是有任公橋後漢朱褒獲麟于馬頰嶺因改名爲麒麟橋○漢犍爲郡理本志云治西北五里犍爲城漢建元中築碑目云漢犍爲太守楊洪碑在彭山縣北小板橋五十年前餘楊洪碑三字今皆磨滅○華陽國志云郡去成都百五十里渡大江昔人作大橋曰漢安橋廣一里半每秋夏水盛斷絕歲歲修理百姓苦之建安二十一年太守南陽李嚴乃鑿天社山尋江通車道省橋梁三津吏民悅之嚴因更造起府寺觀壯麗爲一州勝宇其地東接江陽南接朱提北接蜀郡西接廣漢按晉永和于此置西江陽郡矣初唐沈宇武陽送別詩云菊黃蘆白雁初飛羗笛胡琴淚滿衣送君腸斷秋江水一去東流何日歸○郭璞江賦云流二江于岷嶽註岷山北江所出岷山邛嶽山也中江所出皆東注于大江○寰宇記云岷嶽山在縣東北十二里導江從山南合流下有漢張綱墓志云墓在岷嶽山東百五十步漢書綱字文紀犍爲武陽人仕廣陵太守平賊黨張嬰有恩卒之日嬰率其徒五百人送喪還武陽負土成墳而

去按嵒嶽二山在漢巖道界其尾入江○雲笈七籤云第五北平治在眉州彭山縣上有池水縱廣二百步昔越人王子喬得仙處碑目云此山有大書北平山治之碑餘不可讀碑陰書大唐上元二年道士施仕衡等字本志云北四十里北平治應室宿上有天柱峰夜常見五色燈山下有王喬墓唐杜光庭詩桐栢真人曾此居焚香屋下誦靈書朝回時宴三山客澗盡閒飛五色魚天柱一峰凝碧玉神燈千點散紅渠寶芝常在知誰得好駕金蟾入太虛○南中八郡志云犍爲有魚鳧津數百步一名彭女津在彭亾山

南導江皂江等水會處彭祖塚及祠在此後漢岑彭爲刺客所中而歿又名彭亾山亦名平模山郡國志謂之朝女山云昔有朝祖女于此山得道今足跡尚存故名志云山距治北十二里曰彭女彭模平模平無皆一山○神異記云犍爲有一白虎出則衆黑虎隨之不傷人物漢王褒招碧鷄神詞黃龍見兮白虎仁蓋指此也寰宇記引秦昭王射白虎事非○李膺益州記云周德旣衰九鼎淪散一没于此或見其鼻故名鼎鼻山一名打鼻山上有城亦名鼎鼻打鼻音近也大江過于山下有灘宋將朱齡石伐蜀立寨于

此括地志云鼎鼻山北有龍洲東接導江水按已上
卽常璩所稱王喬升其北山彭祖家其彭蒙白虎仁
于廣德寶鼎見于江漑也○漢書綏和五年犍爲人
上寶磬十六此地因謂之寶磬洲○益部耆舊傳朱
遵武陽人仕爲功曹率兵拒公孫述絆馬死贈復漢
將軍有祠○後漢建安二十四年黃龍見武陽赤水
九日劉氏以爲瑞應因立廟在長江村導江東岍碑
目云漢刻黃龍甘露之碑在彭山黃龍鎮今移于繫
龍橋周地圖記云彭山縣北四里有潭水後漢漢安
元年仙人瞿君武入峨眉山得道每年繫龍于灘麗

籍詩巢鳳閣邊勞遠夢繫龍灘下認前題按已上卽
常璩所稱犍爲上寶磬十六劉向以爲美化所降後
漢朱遵拒公孫述光武以爲士大夫郡建安末年黃
龍見武陽赤水蜀人以爲劉氏之瑞應也○寰宇記
云金華山在彭山縣東五里有丈六佛像夜多神燈
○紀勝云彭山東北六里盤石山普照寺藏有宋太
宗真宗仁宗御書崖之半有石室范鎮詩云窮幽訪
盤石細徑入荒涼踏葉履屨濕觸花衣袂香○方輿
云平蓋山在彭山縣北二十四化之一也七籤云山
下有玉人長一丈三尺昔吳郡崔孝通于此學道得

飛仙本志云平蓋治上應婁宿治前洗墨池唐隱士
羅公遠題詠之處有清暉滌覽二亭提刑張方記以
爲在鼎鼻山椒而勾氏之逍遙軒恰與之相對也杜
光庭詩云勢壓長江空八陣吳都仙客此修真寒江
向晚波濤急深洞無風草木春江上玉人應可見洞
中仙鹿已來馴龍車鳳輦非難遇只要塵心早出塵
亾名氏詩云平蓋山高古木踈昔人曾此築仙居井
通八角寒泉湧觀燬三清劫火餘洗墨池邊丹竈冷
繫龍岩畔石潭虛吟成獨坐荒苔上間看蝸牛學篆
書○七籤云本竹觀在彭山治北相傳以爲竹林黃
帝所手植者杜光庭詩云樓閣層層觀此山雕軒朱
檻一躋攀碑刊古篆龍蛇動洞接諸天日月閑帝子
影堂香漠漠真人丹澗水潺潺掃空雙竹今何在只
恐投波去不還○楊祐甫彭山十事記一日象耳山
二曰彭祖宅三曰大悲道場四曰寶現磨鍼二溪五
曰太白書臺有石刻太白留題云夜來月下卧醒花
影零亂滿人襟袖疑如濯魄于冰壺也杜光庭詩山
中猶有讀書臺風掃晴嵐畫障開花月冰壺依舊在
青蓮居士幾時來六曰師悟志棲二大士會昌寺七
曰薛范二詩八曰龍池蠃泉九曰千歲松栢十曰石

恪畫護法神○志云縣東北二十五里有磨鍼溪在象耳山下相傳李白讀書山中學未成弃去適過是溪逢老媪方磨鐵杵問何爲曰欲作鍼耳白感其言遂還卒業媪自言武姓傍有武氏崖薛能過象耳山詩一色青松幾萬栽異香熏路帶花開山門欲別心潛願更到蜀中還到來又到處逢山更欲登自疑身作往來僧徒行至此三千里不是有緣應不能文同題象耳山寺詩轉谷縈岩路始窮隔林遙望一門通溪山俱在見聞外臺殿盡藏懷抱中像閣呆恩明海日經幢瓔珞撼天風勞生又逐輕舠去珍重高僧解

苦空○碑目云縣北四十里有古塔刻云唐中和三年浴佛日知玄禪師自成都遊峨眉還至此山愛其幽僻遂立庵於上名曰知玄菴○按已上卽酈道元所稱武陽龍尾仙者羽化之所神棲白雲屬想芳流藉念泉鄉遺詠在茲也○寰宇記云馮翊王廟在縣五里古老相傳有漢馮翊王郭子明墓按漢書功臣非賜姓者不得封王恐此非實又漢武帝遣拔胡將軍郭昌再度入蜀討南夷昌字子明漢紀云武帝元封六年益州昆明反使將軍郭昌擊之或卽是此人○碑目云彭山縣東三十里有宋師中碑云梁武陵

王蕭紀寓此練兵欲東下故後人爲立武陵寺○方輿記云縣界有樂黎城唐開元十道要略云漢何斌爲蜀郡太守理於此時郡邑凋殘人物窮困乃以已祿米施惠百姓此數城之民由是獲存臨別百姓以白米倍填曰荷君父之恩無以報後之州郡有職田始于此矣

丹稜縣

志云赤崖山在治北二十里高聳赤色如鳥旂之狀拱翼縣治雖林木叢茂不能蔽之縣以此得名也其下卽多稜川矣○漁隱叢話云花卿冢在丹稜之東

館鎮至今猶顯英氣血食其鄉按花欽字敬定本關中人唐至德間從崔旌遠入蜀討段子璋有功後平寇亂單騎鏖戰喪其元猶操戈至東館鎮下馬沃盥適遇浣紗女謂曰無頭何以盥爲遂自僵什居民葬之溪上廟祀不絕宋封爲忠應公邵博云州西有花將軍廟廟史以匣藏唐至德元年十月鄭丞相誥云花敬定將軍也謝臯羽花卿冢行云濕雲模糊埋秋空雨青沙白丹稜東莓苔陰陰草茸茸云是花卿古來冢花卿舊事人所知花卿古冢知者誰精靈未歸白日西廟鴉啄肉枝上啼緜州柘黃鳧正飛○本志

云縣北十五里龍鵠山三大字宋孝宗書也有松栢
山碑記云山有三宮九觀乃成無爲楊正見李鍊師
成道處唐天寶年建杜光庭題龍鵠山詩抽得閒身
伴瘦筇亂敲青碧喚蛟龍道人掃徑收松子缺月初
懸天柱峯李燾詩曰已作清時鳥倦飛杜鵑何事更
催歸似嫌住處猶城郭不解携家隱翠微其子壁詩
云蕭條白日閉岩扃留作遊人萬古情猶有山中舊
時鹿舉頭如聽讀書聲○此縣有楊素翁者奇士從
黃魯直遊盡刻杜子美兩川詩于眉山所謂大雅堂
也魯直記曰余謫居黔州盡書子美夔峽兩川諸詩
以遺丹稜素翁俾刻諸石使大雅遺音久湮沒而復
盈三巴之耳素翁乃作高屋廣楹以庇此石因請名
焉余名之曰大雅堂仍爲作記其畧云由子美來四
百餘年斯文委地文章之士隨世所能傑出時輩未
有升子美之堂者况家室之好耶余嘗欲忻然會意
箋以數語終以汨沒世俗初不暇給雖然子美詩妙
在無意於文而意已至非廣之以國風雅頌深之以
離騷九歌安能咀嚼其意味闖然而入其門耶故使
後輩自求之則得之深矣使後之登大雅堂者能以
余說而求之思過半矣彼喜穿鑿者棄其大指取其

蜀中名勝記卷之十三
發興於所遇林泉人物草木魚虫以爲物物皆有所
託如世間商度隱語者則子美之詩委地矣

蜀中名勝記卷之十三

邛州

閩中曹學佺能始著

漢書張騫自河源歸來得高節竹植于邛山故名邛
來郡國志云邛崃山自沉黎直走千里至臨邛環抱
爲鎮山圖經云山曰邛崃浸曰邛水民曰邛民毛曰
邛竹矣○水經註云江水又逕臨邛縣王莽之監邛
也莽改成都爲導江太守爲卒正時公孫述爲導江
卒正治臨邛志云廢公孫述城在州南十里○華陽
國志張儀城臨邛周迴六里高五丈其制與成都郫

同○案宇記卓王孫宅在州南五里基方十里耕者
往往得銅錢按史記卓氏之先趙人秦破趙遷卓氏
夫妻推輦而出曰吾聞岷山之下沃野下有蹲鴟乃
求遠遷致之臨邛華陽國志臨邛有古石山出石礦
大如蒜子火燒合之成流支鍊甚剛因置鍊官有鍊
祖廟漢文帝以鍊銅賜侍郎鄧通通假民卓王孫歲
取千匹故王孫貨累巨萬億鄧通錢亦盡天下案宇
記鍊山鑄錢卽此山也山出木蓮不異水之芬芳○
史記司馬相如成都人素與臨邛令王吉善相如
客舍都亭王吉日往朝卓王孫聞於貴客爲具召之

并召令酒酣令前奏琴曰竊聞長卿好之願以自娛
相如爲鼓一再行是時卓王孫有女文君新寡好音
故相如以琴心挑之相如時從車騎甚都文君竊從
戶窺心悅而好之相如乃令侍人重賜文君侍者通
殷勤文君夜奔相如與俱之成都○采蘭雜誌載文
君閨中一井文君手汲則甘香沐浴則滑澤鮮好它
人汲之與常井同本志云白鶴驛有文君井水作酒
味釋無可送李少府之任臨邛詩邛南才作尉調補
一何卑發論惟公幹承家乃帝枝山長風褭棧江蔭
石和澌舊井王孫宅還尋獨有期陸務觀詩落魄西

川泥酒杯酒酣幾度上琴臺青鞋自笑無拘束又向
文君井上來○水經註云江水又與文井江會李永
所導也江上有長堤堤跨四十里有朱亭亭南有青
城山山上有嘉穀山下有蹲鴟即芋也所謂下有蹲
鴟至老不饑卓氏之所以樂遠徙歟○酈道元又云
文井江至蜀郡臨邛與布濮水合華陽國志云布濮
水自布濮來合文井江有火井夜時光映上昭民欲
其火先以家火投之頃許如雷聲火焰出通耀數十
里以竹筒盛其炆藏之可拽行終日不滅也井有二
水取井火煮之一斛水得五斛塩家火煮之得無幾

也博物志云臨邛火井諸葛丞相往視之後火轉盛
蜀都賦云火井沉熒于幽泉是也隋置火井縣于此
舊史云袁天罡爲火井令殘碑尚存有斷其龜趺以
作盆盎者立斃圖經云天罡嘗登山相縣治其處有
相臺山文同寄太博孫公遊火井詩七盤磴道與雲
浮下見高林壓縣樓元時始省入州○張說被使在
蜀詩即今三伏盡尚自客臨邛歸途千里外秋月定
相逢李頻送友人之蜀詩天際蜀門開西看舉別杯
何人不異禮上客自懷才夜澗青林發秋江綠水來
臨邛行樂處莫到白頭回唐求送友人歸邛州詩鶴

鳴山下去滿篋荷瑤琨放馬荒田草看碑古寺門漸
寒沙上雨欲暝水邊村莫忘分襟處梅花撲酒罇又
邛州水亭夜讌送顧非熊之官詩寂寞邛城夜寒塘
對庾樓蜀關蟬已噪秦樹葉應秋道路連天遠笙歌
到曉愁不堪分袂後殘月正如鉤又發邛州寄友人
詩茫茫驅一馬自歎又何之出郭見山處待船逢雨
時曉鷄鳴野店寒葉墮秋枝寂寞前程去閑吟欲共
誰李商隱寄蜀客詩君到臨邛問酒壚近來還有長
卿無金徽却是無情物不許文君憶故夫梅堯臣送
錢駕部知邛州詩細雨梅初熟輕寒麥已秋路危趨

劍道夢穩過刁州秦粟非吳食巴粳類越疇當壚無
復舊試似長卿求范鎮送文與可通判邛州詩半刺
爲官美臨邛自古名何言緹軾寵更侍版輿行仙籍
新年貴賓僚舊日榮壺漿故父老應在半途迎王安
石送文與可通判邛州詩文翁出治蜀蜀士始文章
司馬唱成都嗣音得王揚犖犖漢守孫千秋起相望
操筆賦上林脫巾選爲郎擁書天祿閣竒字校偏傍
忽乘駟馬車牛酒過故鄉問君行何爲關隴正繁霜
中和助宣布循吏綴前芳豈特爲親榮區區誇一方
○鶴山在城西八里常璩云臨邛名山曰四明亦曰

羣羊卽今白鶴也漢胡安嘗於山中乘白鶴仙去弟子卽其處建白鶴臺魏華父營造記曰州之西直治城十里所有山曰白鶴林麓蒼翠江流縈紆蔚爲是州之望隋唐迄今庵院凡十四所遠有胡安先生授易之洞近有常公諫議讀書之庵泉有滴珠樹有木蓮白鶴有臺玉兔有踪中峯信美平雲之觀西岩翠屏萬竹之境皆山中勝處壁間繪像率范瓊杜措丘文播諸人名筆雖丹青剝落而筆法具在本山志云前輩丹青則有任子逸范瓊與夫文同湖州之遺筆文人詞翰則有鄭少微張公庠與夫張商英王賞趙

雍之舊題至於靈鵲去而臺空玉兔潛而石化此山之有可紀書如此宜其歛西州之勝而爲臨邛無窮之觀也信美亭翠平閣俱在山頂勾龍庭實信美亭詩鄰瞿渡水過西頭東面一亭無限幽火井江潮盤附郭浮圖天際表吾州陸務觀翠屏閣詩把酒孤亭半日留西崖獨擅鶴山秋○按益部耆舊傳胡安臨邛人聚徒于白鶴山司馬相如從之受經此縣又有林閭善博學自古天子有輜車之使惟閭與嚴君平知之爲揚雄所師○本志云西十里盤陀山有石刻佛像唐人鑄吳師二字其上又有郭汾陽師四字五

代及宋人皆有書墨○又云西八十里萬松亭魏太和中建于山絕頂今僅遺址文同詩云四野豁嘉亭松門夜不扃水邊來半偈月下了殘經又云西百里石盤戍俗呼爲望軍頂昔諸葛武侯駐軍于此○碑目云臨邛令封君遺愛碑陳子昂撰又云大唐邛州臨邛縣花置山寺新造無量壽佛石龕像記朝議郎守太子左贊善大夫前殿中侍御史馬宇撰元祐丁卯十二月立碑又云邛州天慶觀希夷先生詩刻文同跋元豐中元日書

蒲江縣

蒲江者以治枕蒲水也志云南八十步蒲泉方丈許冬燠夏涼四時不涸蒲草生焉有亭覆其上曰蒲亭○方輿勝覽云浴丹池在蒲江縣之崇真觀世傳軒轅修煉于此鶴山集云嘉泰中常有羣鶴西來翔舞於紫極殿之前檻自後間歲一至志云紫極觀在蒲江治內○七籤云主簿山治在邛州蒲江縣界郡主簿王興于此學道得仙一名長秋山南有石室玉堂松栢生其前本志云長秋山有卧牛井昔女冠楊正見修煉于此得石卧牛于下砌井而泉湧出今井碑尚存寰宇記又謂之小可慕山言登此山景慕仙風

非小可也○紀勝云南十五里莫佛鎮相傳漢文帝時有莫將軍征西南夷歸而學佛于此其佛臺前石羊虎尚在居民往往于其處得金銀杜光庭莫公臺詩奇絕巍臺峙濁流古來人號小瀛洲路通霄漢雲迷晚洞隱魚龍月浸秋舉首摘星河有浪自天圖畫筆無鈎將軍悟却希夷訣贏得清名萬古留

大邑縣

寰宇云大邑縣唐咸亨三年分益州晉原縣置在鶴鳴山東道書云鶴鳴山二十四化之第三化也應氏宿山有二十四洞應二十四氣洞口約闊三尺深不

可測每過一氣則一洞竅開餘皆不見有七十二穴應七十二候東西二溪出其兩腋太清宮建在頂喙玄真坊建在頂大坪是其背延祥觀在天柱山石柱腰岩是其兩翼冠子山三峯中峰是其尾乃馬成子張道陵昇仙之處杜天師崔鳴山詩五氣雲龍下泰清三天真客已功成人間回首山川小天上凌雲劍佩輕花擁石壇何寂寞草平轍迹自分明鹿裘高士如相遇不待岩前鶴有聲文同題鶴鳴化上清宮詩秘宇壓孱顏飛梯上屈盤清流抱山合喬樹夾雲寒地古芝英折岩秋石乳乾飈輪遊底處空自立層壇

東北十五里有青霞峯峰下有碧玉潭劍南詩藁云
青霞嶂碧玉潭皆山水佳處詩云千岩角逐互吞吐
一峯拔起矜崔嵬日光微漏見潭底水氣上薄雲成
堆志云此山常孕雲霧又名霧中山峯頂有金剛足
跡曰金剛臺張俞詩霧山環合自雲川戶有清溪種
玉田萬木桃花不知處幾人曾得問秦年碑目云崔
鳴山柱腰岩有李陽水篆龜雀齊年及陳搏草書福
壽大字○勝覽云平雲亭在大邑之靜惠山蓋文忠
范公鎮所居公熙寧間上疏論新法致仕既還蜀窮
山水勝處徜徉此山詩云磴道雖云險肩輿亦可行

坐來知日永立處與雲平本志云靜惠山一名東山
山下土城相傳是蜀漢將軍趙雲築蓋雲嘗防羗于
此有雲墓及廟存○通志云鳳凰山在大邑西八十
里勝覽云鳳凰山有虎劈泉唐契覺道人結菴于此
有虎爲之擘地出泉有栢十圍根盤巨石之上如騎
鯨然曰騎鯨栢文同邛州鳳凰山新禪院記云臨邛
郡西北皆大山所叢衍迤磅礴深蟠遠走直注大渡
限迤巒譎鬱如雲烟涌如波濤晴光陰嵐明昧一矚
其間孤峯峗然傑立豪峙首領崖巘腹背聳阜翼開
長巒尾掉高岡繁林茂樹綠蔭纈菜圍擁森合粹若

蜀中名勝記卷之十三
毛羽地志書之曰鳳凰山者蓋前人嘗以狀而名之
爾唐有契覺道人艾草鑿址構庵此地日禮華嚴祕
典以作佛事嘗汲泉澗下頗念其遠有虎爲之擘地
出泉澄潔甘凜悉異他所發源甚盛于今賴之矣

蜀中名勝記卷之十三

蜀中名勝記卷之十四

雅州

閩中曹學佺能始著

史記秦始皇二十五年滅楚徙嚴王之族以實此地
故曰嚴道漢爲縣屬蜀郡文帝徙淮南王之族於此
楊用脩蜀志補遺引蜀本紀以爲許由之友嚴僖所
隱地也○漢高六年分置青衣縣水經青衣水出青
衣縣西蒙山東與沫水合註云縣故有青衣羗國竹
書紀年梁惠成王十年瑕陽人自秦道嶠山青衣水
來歸漢武帝天漢四年分沈黎郡置西部都尉王青

衣公孫述之有蜀也青衣不服世祖嘉之建武十九年以爲郡安帝延光元年置蜀郡屬國都尉青衣王子心慕漢制上求內附順帝陽嘉二年改曰漢嘉得此良臣也本志又有邛穀王任君貴越雋人新莽之亂奮集英雄起越雋殺莽所立太守枚根而自立保全一方見西南夷傳按州城隅有任使君廟矣○晉末李雄竊據夷獠雜居西魏僑立蒙山縣後置雅州郡國志云漢源縣有離堆蜀守李永所鑿離即古雅字也州以此名○圖經州治舊在雅安山上大中祥符間國子博士何昌言爲守以地多嵐瘴徙于山之

麓本志云州治後雅安山又名月心山山形如月象心字州治左點所治右點文廟居中皆倚山也○禹貢蔡蒙旅平和夷底績葉少蘊解云蔡在嚴道蒙在漢嘉漢嘉即嚴道也舊傳諸葛亮于此夢見周公因立文憲王廟遂號周公山按文憲王廟記軍事推官王育撰叅軍李夔徵書矣周公山半有石筍移之即雨窠宇記云山勢屹然有龍穴常多陰雲李燾遊蔡山序蜀惟岷山蔡蒙二山雅獨兼有之本志云旅平者禹治水成功旅祭于此俗呼爲落平山頂有萬壑亭在焉○窠宇記云和川路在縣界西去吐蕃大渡

河五日程從大渡河西郭至吐蕃松城四日程羗蠻
混雜連山接野鳥路沿空不知里數卽禹貢所謂和
夷底績也本志云東北有和夷壩是矣○大唐新語
云陸象先爲益州長史奏嘉邛路遠請鑿岷山之南
以從捷近發卒從役居人不堪道亾瘡歿行旅無算
左拾遺張宣明監姚雋諸軍事兼招慰使親驗艱險
移牒益州曰此路高山臨雲深谷無景至有斗絕巨
險不通人蹤經之者必搏壁傍崖脅息而度雖竟日
登頓二十許里木人猶堪淚下鐵馬亦可蹄穿象先
覽之兢惕遽罷役仍舊路以聞蜀人賴焉○孫漸昭

應廟記云其山蔡蒙其關邛崃水經注云岷山東北
百四十里曰崃山中江所出東注于大江崃山邛崃
山也在漢嘉嚴道縣一曰新道又東百五十里曰崃
山北江所出東注于大江故郭景純江賦曰流二江
于崃崃也○圖經云嚴道山在縣南五里本名鹿角
山唐天寶六年勅改爲嚴道山山下有丙穴出嘉魚
方輿云萬勝岡在州西有龍觀寺其趾曰百丈山自
邛崃或起或伏環遶州治本志云諸葛武侯擒孟獲
旋師至此岡下人聚觀之因建亭于上爲龍觀亭○
碑目云高孝廉墓碑在嚴道縣東二十里按其碑有

年月乃漢建安十四年立高君兄弟皆孝廉有二石
闕其一曰故益州太守武陰令上計吏舉孝廉諸部
從事高願字貫方其一曰漢故益州太守陰平都尉
武陽令北府丞舉孝廉高君實字貫光又一大碑其
首云故益州太守高君之碑本志云漢孝廉高君墓
在金鷄山下孝廉橋墓跡蕪沒惟二石坊在田中坊
亦以大石堆堦而成非石柱也其一方隸云漢故益
州太守陰平都尉武陽令北府丞舉孝廉高君仍有
數字剝落方輿云金鷄山在嚴道北三十五里俗傳
有金雞鳴于此循金鷄山而上二百步有石室中有

石像爲爾朱真人宋嘉泰中刻尚存碑目又云羊竇
道碑在嚴道縣東三十里金雞山下漢永初六年碑
也○梁益記云大小漏天在雅州西北山谷高深沉
晦多雨而黎州常多風故謂黎風雅雨宇文溥新路
賦惟天下之至險有嚴道之漏閣焉孤峯上絕于青
天湍波下走于長川斷崖橫壁立之岸飛溜濺千尺
之泉洪造隸釋云蜀郡太守何君閣道碑光武中元
二年刻此碑蜀中近出東漢八分斯爲之首字法方
勁古意有餘如冠章甫而衣縫掖使人起敬不暇雖
敗筆成家未易窺其藩籬也○碑目云平羗江繩橋

碑在嚴道縣平羗橋有唐咸通十年上官朴所撰碑
字亦隸體今在江瀆廟方輿云平羗江源出西徼遼
西北郭謂武侯平羗夷於此又云沫水自廬山發源
注于平羗江與沉黎之陽山江合流○本志云州西
北一里曰清源橋東北十里龍門橋三十五里道遠
坦橋五十里魚喜河橋西七里曰銅頭河橋近多功
路曰大繩橋已上皆索橋也凡橋每歲仲春于兩岸
各樹兩臬長二丈有奇臬上橫穿二枸上布竹繩亘
兩岸繩之餘者屈垂向下輓轆絞束復橫以木梯布
以篾笆周以欄索其高低闊狹視江爲度唐獨孤及

索橋贊曰竿相引一索人綴其上如猱之縛轉帖入
淵如鳶之落尋橦而上如魚之躍頃刻不戒霄無底
壑卽此橋也○錄異記云唐王果謫雅州刺史經平
羗江中望岩腹有鍤棺欲墜緣崖視其碑曰地裂山
崩水漂我臨及長江危欲墮欲墮不墮遇王果五百
年後改葬我乃改葬之○本志云州北百四十里山
谷中湧泉深不可測一日三潮風浪如雷昔時白馬
自泉出田野間雲擁之復沒名曰白馬泉又曰龍淵
又曰龍門有宋紹興間祈雨碑猶存○此州韵事有
雙鳳亭在署廳後爲蘇子瞻子由設至和中老泉携

二子謁太守雷簡夫雷以書薦于張文定公及韓魏公歐陽文忠公其後太守樊汝霖作堂以表其事○無絃亭在州學南長濱江側隱士王潛所居潛好琴趙清獻公爲榜其亭曰濯纓文同書○黃魯直木蘭歌帖梁甫吟帖俱在郡治○竹溪在郡西三十里隱士胥九鼎所居陶仙洞在焉有林泉之勝魏了翁寄題胥園詩云胥君頎然來錦囊背奚奴探囊發詩卷一一卿大夫夫識胥園面詩卷自畫圖掃石卧石影長鍾斲芋區胥君於此時林泉傲金朱

名山縣

禹貢蔡蒙旅平蔡屬雅州而蒙屬當縣矣九州記云蒙者沐也言雨露常蒙也山有五頂最高者名上清峯有甘露井水極清冽四時不涸相傳漢僧理眞所鑿後日隱化井中圖經云蒙頂茶受陽氣全故芳香獨烈方輿云虞允文嘗爲名山監茶今清溪橋頭北廳猶在有梅及槐柳皆雍國手植壁間遺墨尚存○水經注曰縣有蒙山青衣所發東逕其縣與沫水會于靈關道寰宇云平羌水上源曰邛崃水又名平鄉水西北自嚴道縣流入自眉州洪雅縣界下又名青衣水本志云五頂山下青衣河流遶縣前下田水口

入嘉州○寰宇記云羅繩山在縣西五里從蒙山西流入廬山縣又北接邛州大井縣又云鷄棟山在縣西南十七里地里志以蜀有鷄鳴山俗傳金鷄鳴天下太平也紀勝云鷄鳴山卽古之名山因爲名山戍○碑目云名山治東一里許有紫府飛霞洞開禧丁卯邑人苟洙于梓潼觀後甃一洞穴刻神之父母像併鑿石龍蟠于其中請神作記親書于石今石龍書院是也○本志云東北三十四里古土城周七十二丈乃武侯征蠻所築遺址見存○寰宇云大慕山在縣東四十里南接河羅戍北入邛州高七十里上聳

天際靈恠錯雜之所○九州要記云百丈縣本嚴道縣地李膺記臨邛縣南百二十里至百丈卽其地圖經云有一穴口方圍百尺深如之山有九折坂夏則凝冰冬則毒寒漢王陽爲益州刺史行部至此興歎因之棄官唐武德元年置百丈鎮貞觀八年改鎮爲縣今之驛曰百丈里曰安賢矣本志云百丈河在東北六十里源自蓮花山來經百丈驛東與邛水合流至新津入白馬河又名千尺潭又云百丈縣南五里銅鼓山爲漢唐戍守之地○寰宇記云泉池山在百丈縣東四十里山四面縣絕上有泉池因名○本志

又云東南七十里佛鼻山左石有二目謂之天目元時於左目下建寺曰天目有大石甕小石甕之名

榮經縣

寰宇記榮經縣本嚴道縣地東西連接大山並無州縣巖巒阻絕不辨疆界唐武德二年置縣因界內有榮經水口戍爲名本志云榮水在城北一出相公嶺一出番境經水在城南一出瓦屋山一出改丁河一出汶川按相公嶺者以諸葛丞相征蠻所經也改丁河源出黑石汶川源出邛崃馬耳榮經水北流入擒孟渡即孔明七擒孟獲之地○方輿云瓦屋山在榮

經縣東北二十里形如瓦屋上有念佛烏娑羅花其岩朝現辟支午現普賢夜有神燈或問禪惠大師瓦屋何故却以木皮蓋師曰錦府豈從機上織劍門寧自匣中開李燾詩瓦屋如廡平金仙闢光景○雅安志云榮經西北三十里紫眼關以紫眼番人僑寓得名卽甕溪關○寰宇云邛崃關在縣西南七十里隋大業十年置約山據險當雲南大路以扼番夷之要害碑目云邛崃關開路記天寶六年章仇兼瓊撰又云漢蜀郡太守治道記碑在榮經縣西三十里建武中元二年立又云尊健閣碑建武中元二年物亦在

縣西三十里景峪懸崖間巽岩李燾有跋以辨正年譜且引後漢紀建武二十三年夏四月改爲中元無建武字又按祭祀志改建武二十三年爲建武中元元年以此知記與志合而紀失之矣又云神水閣記碑在榮經縣東三十里銅山峽中碑久磨滅不可考古老相傳其體大率如尊健閣云

廬山縣

寰宇記云廬山縣亦嚴道縣地晉書地理志姜維于此置城隋仁壽元年重開此地遂于姜維古城置廬山縣以界內廬奴山爲名按紹興二十三年徐閔中

記土人祀姜伯約有廟額曰平襄○志云治有開明王城故址華陽國志蜀王開明以靈關爲前門寰宇云靈關山在縣北二十里峯嶺嵯峨傍夾大路下有山峽口闊三丈長二百步俗呼爲重關通蠻貊之鄉入白狼夷界漢書通靈山有眼孔四一名鏤靈山文選註靈關山名在成都西南漢壽縣界陳陰堅蜀道難云王尊奉漢朝靈關不憚遙高岷長有雪陰棧屢經燒輪摧九折路騎阻七星橋蜀道難如此功名詎可要隋孔德紹送蔡君知入蜀云靈關九折險蜀道一二星遙乘槎若有便希泛廣陵潮按張揖注史記曰

漢鑿開靈山道于此置靈道縣矣○寰宇記云盧奴山在縣東五里與始陽山相接始陽山在縣東七里本名蒙山唐天寶六年勅改爲始陽山高八里東道控川歷巖道縣橫亘入邛州火井縣界又云大渡水從生羗界來流入浮圖水浮圖水在縣五里從生羗界來水中有孤崖狀如浮圖出貢金○志云蘆山南十里三江渡通天全六番下注多功峽入雅之平羗江多功河上飛仙閣爲木棧道卽古漏閣也○方輿云龍頭山在蘆山縣前後峽綿亘四十里夭矯如龍控接番部實爲要害又云崖鉢山在縣西三百里上

聳雲漢莫測其高○志云漢樊敏墓在縣南七里前有二石馬隸碑在石馬東碑目云漢故檢校巴郡太守樊府君碑建安十年三月上旬造又云兩面碑在蘆山縣南五里與府君碑甚近碑面與背皆有篆文歲久訛闕不可識或辨其文曰蘆山縣碑○宋趙明誠金石錄云右漢巴郡太守樊君碑其文云君諱敏字叔達肇祖處戲遺苗后稷爲堯種樹舍漆從岐天顧曹甫乃萌昌發周室衰微雲伯匡弼晉爲韓魏魯分爲楊充曜封邑厥土河東肆漢之際或居于楚或集于梁君績其緒華南西曷又云總角好學治穀氏

經貫究道度無文不睹于是國君備禮招請濯冕題
冠傑立忠謇有夷史之直卓處之風鄉黨見歸察孝
除郎永昌長史遷宕渠令大將軍辟光和之末京師
擾攘雄狐綏綏冠履同囊封挾長驅卑走枕北國復
重察辭病不就再奉朝聘七辟外臺嘗爲治中諸部
從事又云季世不祥米巫妘虐姦狡並起陷附者衆
君執一心賴無滲耻復辟司徒道辭不往牧伯劉公
表授巴郡以助義都尉養疾閭里又辟奮義都尉年
八十有四歲在叶洽紀驗期臻奄忽藏形其後有銘
題建安十年二月上旬造他漢碑類多刊缺而此碑

首尾完存故載其大畧于此所謂米巫凶虐者謂張
角也宋成都丘常跋云此碑相傳名魏受禪碑爲世
絕出而其款乃建安十年又在黃初之前雖暴露中
埜而字畫醇古文尚可讀豈非所寓僻遠而人無知
者歟然而千餘年間霖雨之所濯盛陽之所暴有獸
已倒有門已摧而此碑將什是可憫也余因扶其旣
倒植其將什又爲屋以庇之庶幾永其傳也崇寧壬
午知縣丘常題○宋程勤跋云皇上勵精更化以揚
祖宗之大烈屬當京師父老流涕太息思欲復見漢
官威儀之時而僕仕于廬山天下最窮處迺得建安

十年巴郡太守樊君故碑於深山榛莽間亟作大屋覆其上表而出之目其顏曰巴郡太守樊侯之墓嗚呼碑陰所記崇寧壬午距今五十八年而遙任斯邑者皆吾鄉人扶倒植什偶相似然豈物之廢興固有數耶紹興己卯眉山程勤懋傳書○國朝李一本跋云此碑踞于道周迨今幾千有餘歲矣在宋以前訛爲魏受禪碑大明一統志謂其字文漫滅不可攷以故惑于聞見者不爲注日子捧檄竊祿于茲屢經過焉見其荒于荆榛蝕于莓苔亦謂信然越弘治己未仲冬因偕門生白應清駱琰陳宣宋萬全等訪故偶

過其下因束篠爲帚掃拂之條見字畫隱隱而出皆醇古迥異從者進曰此商彝周鼎復出也殆奇遇乎亟爲磨洗尋具楮蜡如法摹搨得墨本有三蓋以防字畫之同異者而考正之然其模糊不可讀者亦過半矣旣而歸置軒次校以隸本參以衆目就其可識者僅得什之九其疑誤者則傍爲點注以俟博古者正焉載攷古文苑所紀樊毅樊安等碑亦靈獻中所作其屬辭比事與此文勢相類或者當時史遷之徒爲之也夫文選所集皆秦漢以來古文而此碑獨不見錄古文苑乃補文選而作又不見載母亦此地僻

在遐荒而人不知歟抑惑于聞見之似而不及錄歟
吁是碑雖不見錄于古幸而石不泐壞延有今日得
以附入邑志以永其傳亦竒矣匪徒爲斯邑之炎實
斯文之幸也然則世之爲志者苟徒據耳之所托而
不博歷以致審焉則雖有石鼓之文其不至于湮沒
無聞者幾希矣是月十一日長至蜀忠南李一本識
廬山廣文也

蜀中名勝記卷之十四

